

Aqqusinernik aqqissuussinernut pilersitsisarnernullu, ilisimalikkanik ataqatigiissaariitigaluni katersuivimmik, kommunillu susassaqqarfimmi suliniutaannik ikorfartuisarfimmik aqqusineqarnikkut ingerlatsivimmik pilersitseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Hermann Berthelsen, Siumut)

Akissuteqaat

(Ineqarnermut Attaveqaqatigiinnermullu Naalackersuisoq)

Aappassaaneerneqarnera

Naalackersuisut sinnerlugit Sanaartornermut Ataatsimiititaliaq siunnersuutip suliarineqarneranut atatillugu sulilluarsimaneranut qutsavigaara.

Ataatsimiititaliami ilaasortat isumaliutissiisumminni siunnersuut manna upernaq manna ataatsimiinnermi immikkoortoq 134-mut, umiarsuarnut sinersortaatinut tunngasumut atatippaa. Immikkoortoq 134-mut isumaliutissiisummi Ataatsimiititaliap Naalackersuisunut kaammattuutigaa, nunap immikkoortuanut aamma nuna tamakkerlugu attaveqaqatigiinnermut pilersaarutit tamarmiusut immikkoortumut pilersaarutinut ilannguteqqullugit. Ataatsimiititaliami ilaasortat kaammattuutaat Naalackersuisunit tigulluarneqarpoq.

Sanaartornermut Ataatsimiititaliap Inatsisartut aalajangiinerannut matumunnga allannguutissamik siunnersuuteqarnerata kingunerisaanik aqquserniornerit pillugit ilisimasanik katersuivimmik ataatsimoortumik ilusilikkamillu pilersitsisoqassaaq, taamaalillunilu nuna tamakkerlugu attaveqaqatigiinneq ataatsimut ataqatigiissaarneqassalluni.

Kalaallit Nunaanni angallasseriaatsimut pilersaarutit imminnut atasut innuttaasunut iluaqutaassapput. Pilersaaruserniornermut tulleriiarinermullu ataatsimoortumut aamma aqqusernit ilaatinneqassapput.

Taamaattumik Sanaartornermut Ataatsimiititaliap allannguutissatut siunnersuutaa Naalackersuisunit taparserneqarpoq. Taamatut oqaaseqarlunga siunnersuut Inatsisartuni kajumittumik suliassanngorlugu tunniuppara.